

梅邊吹笛譜  
附補錄

二





梅邊吹笛譜

附補錄

(一)

凌廷堪撰

王雲五主編  
叢書集成初編  
梅邊吹笛譜  
附錄  
二冊

中華民國二十六年六月初版

撰者 凌 廷 堪

發行人 王 雲 五  
上海河南路

印刷所 商 務 印 書 館  
上海河南路

發行所 商 務 印 書 館  
上海及各埠

周

(本書校對者潘其璇)

# 梅邊吹笛譜卷下

## 踏莎行

讀花外集。卽用碧山題草窗詞卷韻。

積玉敲聲。兼金鑄調。除將樂笑齊驅少。一從花外翠簾空。天涯處處生芳草。梅影深情。尊香幽抱。於今俊語無人道。孤吟山鬼語秋心。鑒湖霜後芙蓉老。

## 摸魚兒

趙叟雪篷。於市中得歐陽信本書姚恭公碑。蠹簡二幀。僅二百許字。綜錯成文。爲孫讚祖墓誌一首。蓋憑虛公子也。裝潢成冊。持以見示。屬製長短句紀之。遂賦此解。

羨先生。率更書法。零章殘簡親購。天吳紫鳳。頻顛倒。拆碎海圖重繡。

亡是叟。今爲汝。一篇隧石殷勤構。秋魂未朽。倘此夜鐙前。徘徊瞰室。奠汝一杯酒。文章事。祇要天機在手。何須苦脫窠臼。殘槍半段哥舒用。辟易萬人皆走。君記否。諛墓物。千金徒作劉君壽。何如信口。向廣莫鄉中。虛無境裏。子細說烏有。

滿江紅

南呂宮

鄔覺庵招飲。席上以懷其友胡君新詞見示。屬余和之。爲賦此解。

豪士相逢。閒抵掌。芳醪細斟。翻玉露。退紅簾罅。空翠庭陰。云有故人真快士。每攜古調覓知音。惜春江。昨已送歸橈。無路尋。吟俊語。勞我心。知此日。向誰吟。望淮山青處。一往情深。斯際短章聊刻燭。何時長嘯共開襟。譜相思。一曲和清商。彈素琴。

壽樓春

春憶寄和酌亭

愁青山迢迢。縱相思有夢。難度長宵。那更花飛江館。柳垂溪橋。眠又起。眞無聊。笑客愁、渾如春潮。奈燭外淒涼。尊前冷落。今夜倩誰消。情空遠。途非遙。想雙蛾此際。猶自含嬌。擬覓松間油壁。水邊蘭橈。春思斷。離魂銷。聽翠樓、誰家吹簫。算何日相逢。瑤琴共調忘寂寥。

元作

續溪章 洞酌亭

縈春情纏綿。是風中戲蝶。花外啼鴉。底事晴江無盡。暮雲無邊。凝望際。空生憐。溯舊游、依依經年。漸別夢頻增。歸期倦數。芳月幾回圓。唯招隱。休逃禪。算拋將麗景。分付閒眠。又到江籬生後。海棠開前。飛絮亂。游絲牽。料玉人、羞爭春妍。趁雙鯉乘潮。臨風悵然題錦箋。

高陽臺 商調

庚子清明日。同方竹樓、趙雪篷、鄔覺庵、諸君。飲郎鉏月城西園亭。

社鼓調鶯。錫簫警燕。清明人在天涯。賴有吟朋。尋芳約到山家。春痕幾日無消息。伴小紅、潛上桃花。透柴扉。一縷新煙。應是烹茶。相逢競道郊原好。有爭馳繡鞚。疾走鈿車。十丈香塵。惜惜吹滿晴沙。何如小坐維摩室。引翠尊、同酌流霞。醉歸來。微墊烏巾。雨細風斜。是日將歸遇雨。

絳都春

黃鐘宮

福印庵看牡丹

憐春老去。甚獨訪殿春。親來琳宇。幾疊翠綃。一片紅雲縈芳緒。霞裳纓絡無重數。更七寶、莊嚴如許。自慚居士。難空結習。漫勞天女。嬌嬾。風前綺麗。似浮世、富貴總難憑據。認取妙香。如幻空花誰能悟。拈來微笑呼禪侶。但相對、含情無語。綠陰他日平階。幾番夜雨。

南浦

新潮和方竹樓

風滿驛樓空。雨絲絲。遠近江聲連曉。猶記去年時。柴門外。驗取舊痕將到。穀紋乍起。望中惟覺前洲小。沙嘴高低吞吐處。已有白鷗飛繞。朝來試覓漁蓑。擬持竿兀坐。臨流垂釣。磐石遍苔花。東風起。須倩綠楊先掃。烟波浩淼。故人曾放春前棹。此際溪頭雙鯉便。迢遞尺書應早。

疎影 仙呂宮

新錄和竹樓

年芳暗惜。賸遠林幾疊。空翠如織。掩映疎煙。遮斷孤村。欲共前峰爭色。蒙茸染得嬌如許。悄莫道、東風無力。怕夜來冷月橫窗。碎影亂侵簾隙。那更連朝暗雨。望中但一片。春已狼籍。寂寂橋頭。漠漠牆腰。



一縷斜陽猶碧。濃陰半壓生衣重。甚滿地、寒雲堆積。想玉人此際憑欄。尙覓斷紅消息。

齊天樂 正宮

豆棚

廢畦滿地秋陰瘦。疎花亂垂高架。漸挂蠨蛸。潛移蟋蟀。都向茅檐橫亞。磁甌對把。愛香茗初斟。檜條籬下。五五三三。晚涼閒共故人話。幽棲仍有樂事。曉來輕摘取。聊供杯斝。小筴初肥。修藤半老。粧點廚娘聲價。西風暗打。聽無限蕭疎。盡投窗罅。絕勝芭蕉。雨聲連夜灑。

水龍吟 越調

眞州送程時齋

二年南北迢迢。清尊又聚鑿江路。征衫乍拂。相看一笑。離悰休訴。山翠飛箋。荷香侵硯。水亭無暑。趁湘簾蘄箬。纖塵不到。重檢點。當時譜。

雨後霜毫共舉。按紅牙、細敲新句。聯吟未幾。西風又早。送君南浦。對此茫茫。百端交集。重逢何許。漸扁舟欲解。微黃著柳。記分攜處。

解連環 商調

潘氏園看桂花

一林香粟。記前番到處。尙含濃綠。乍樹底、纔度西風。早齊換淡黃。道家裝束。月裏天香。笑人世、無他芬馥。算深憐劇護。貯此阿嬌。祇有金屋。淮南又吟舊曲。悵難招隱士。孤負林麓。漫席地、輕撥湘絲。便金鏤歌殘。怎訴幽獨。占斷秋光。似遲暮、佳人空谷。向名園、伴伊對飲。澹然意足。

摸魚兒

雨後江上晚眺

暮天空、乍收涼雨。隔江飛過清冷。烟鬟綽約。山容潔。掃得兩蛾幽靚。

無限景。縱倩取、鏤冰琢雪應難詠。斜陽未暝。見別浦殘荷。迴汀折蓼。都作淡紅影。江光遠。蹙起靴紋萬頃。微風恰好初定。盈盈十五吳娃小。笑與碧波相映。嬌妬性。有意要、驚他沙上鴛鴦醒。青裙半整。便急打蘭橈。空明擊碎。搖過采菱艇。

齊天樂 正宮

乞張桂巖寫姜石帚暗香詞意小照

截金鑄作姜郎句。孤飛白雲娟秀。月舊花新。情長夢短。總是銷魂時候。梅邊對酒。愛紫綺斜披。玉龍低奏。試問塵容。可堪移入畫圖否。文窗晴色淡冶。剡藤裁幾幅。閒度清晝。細拭并刀。輕調越粉。比似香詞誰瘦。宵寒坐久。好添取花陰。亂堆吟袖。除卻疎枝。夜深誰是偶。

揚州慢

中呂宮

博士金棕亭先生。招同林庾泉、吳暮橋、金畹芳、尺五樓看芍

藥花。

荷貼波圓。棟搖風碎。繞闌芍藥齊開。坐花天尺五。近閱苑蓬萊。看粧點、芳園麗景。玉盤金帶。紅紫成堆。更圍屏、深護雲根。何日移栽。畫船載酒。羨湖山、裙屐頻來。愛郁郁濃香。亭亭豔影。遮映池臺。莫信殿春歸去。多情甚、轉約春回。算端明題後。於今誰繼仙才。

玲瓏四犯

雙調

題張竹軒詩卷

赤壁洞簫。黃樓橫笛。聲聲無此清峻。妄希餘子步。竊祕中郎本。都從筆端遣盡。卻依然、六朝遺韻。捉搦新歌。紆那別調。丰致最相近。方牀雨餘微潤。正荷風細寫。桐露徐引。近來詩派雜。大雅無人問。牛溲鼠腊爭相貴。有誰似、先生持論。須忍俊。攜歸向琅邪舊隱。

摸魚兒

題桃溪圖用石帚體

費東君、幾番煙雨。桃花千樹開了。澄溪一帶明於鏡。時有亂紅飛到。人悄悄。倩誰問、年年底事春信早。扁舟趁曉。便燕外窺香。鷗邊覓路。輕泛武陵棹。遙天裏、隱約峰巒合抱。衣沾蒼翠多少。低枝半亞春流上。脈脈向人含笑。情渺渺。想前度、纖肌秀鬢應更好。披圖夢繞。但月鎖山腰。雲封洞口。處處盡芳草。

浣溪沙

黃鐘宮亦入中呂宮

白門春望和張平伯

桃樹遮門柳拂隄。春光多在石城西。胭脂井畔曉鶯啼。不見美人青玉案。空聞遊女白銅鞮。畫輪歸去草萋萋。

淡黃柳

正平調

同林仲深阮伯元游淨香園

春波溜碧。黃染初三月。買得蘭橈輕且潔。盪破疎煙淨綠。來看牆東  
數株雪。怕離別。天涯正啼鴉。漫惆悵。遠芳歇。料東風、不比秋騷屑。  
記取今宵。故人同話。垂柳依依待折。

浣溪沙

黃鐘宮亦入中呂宮

諸葛武侯故里

五事虛傳訪軼聞。淒涼綿竹冷斜曛。琅邪名士孰如君。才過曹丕  
甯十倍。運移漢祚竟三分。故山喬木尙連雲。

霜天曉角

越調

大風。同胡眉峰野飲黑窯廠。

滿天蕭索。拂面風如削。野肆冒寒沽酒。千古事。共商略。漠漠。塵土  
落。傾杯還對酌。牧豎隔離籬相笑。應不解。兩人樂。

齊天樂

正宮

同汪容甫訪江豫來留飲

泥人金粉雷塘路。依依半城煙柳。俊語雕花。清辭鏤月。比戶鴛鴦爭  
繡。儒風在否。好攜取經神。華門偕叩。訓故專家。阿誰吳下嗣紅豆。  
欣然相視一笑。便盤餐小酌。同話耆舊。易溯荀虞。書研馬鄭。信有師  
承傳授。淵源細剖。漸暝色蒼然。月窺虛牖。洗盞重斟。碧笛香到酒。

憶舊游慢

泛舟歷下亭

愛青涵雉堞。綠浸魚樁。小雨初收。點破玻璃影。趁斜陽未晚。喚取蘭  
舟。練光乍開塵鏡。無限鵲華秋。笑半日停驂。征衫暫拂。聊與淹溜。  
風流但陳跡。想玉佩雲山。北海曾遊。寂寞空亭外。賸菰蒲一片。飛下  
輕鷗。漫尋舊時名士。煙冷白蘋洲。漸老卻芙蓉。花邊仿佛人倚樓。

齊天樂 正官

酌突泉

阿誰謀報中央德。空山鑿成三竅。水欲騰天。泉能拔地。信是神工奇巧。峰巒四繞。看鳴玉跳珠。匯成清沼。涌若車輪。措辭唯有酈元妙。鍾離祠宇競葺。二堂存廢址。無與蒐討。碧榭棲鸞。丹臺控鶴。總學方壺圓嶠。仙踪半杳。算霞外孤情。幾人舒嘯。擬拂虹竿。翠瀾深處好。

臨江仙

乙巳三月十八日。偕張桂巖、胡樹思、牛次原。觀京城諸伶賽會。

幾陣廉纖春夜雨。西山洗出修眉。曉晴沙路馬行遲。薔薇將謝後。芍藥半開時。角觥天街陳百戲。靈風吹滿華粦。巴童也自效吳兒。旗亭今夕酒。知唱阿誰詞。

霜天曉角 越調



丙午六月二日晚涼。偕張鄂樓、牛次原、閒步陶然亭遇雨。  
暮天岑寂。遠岫涼煙冪。曲榭凭欄閒話。聽細雨。響蘆荻。浙瀝池上  
滴。芙蕖舒紫葍。觸起故山情思。風柳外。數聲笛。

摸魚兒

萬華亭招同陸以甯、張柱巖、葛菱溪、唐柘田、汪繡谷、小飲寓  
齋。醉後作。

笑吾曹挾書燕市。青袍終日塵擁。殘盃冷炙酸辛極。幾見翠筵炮鳳。  
俱蟻螻。算只有、簾前春色千金重。豪情乍湧。似渴驥奔泉。長鯨吸海。  
今日酒徒共。天涯會。都是荆高伯仲。簷花深夜風動。消磨諛墓囊  
中物。買得杜康盈甕。誰賈董。便瑣瑣、虛名身後知何用。鷓鴣互捧。任  
蕭寺鐘鳴。譙樓鼓歇。不醒醉鄉夢。

眉嫵

同章實齋、武虛谷、小飲朱少白未之思軒。時予與少白新下第也。

正窗蕉敲雨。徑菊搯霜。同坐翠陰下。不敢吟歸燕。貂裘敝。茫茫羈緒難寫。晉甄漢瓦。笑近來、齊耀聲價。幾曾具、鐵網珊瑚識。漫評議真假。

壁上懸漢瓦拓本甚多。

休訝頻傾芳罍。便校成七略。何似三雅。舊日湔裙伴。青雲

外。聯翩鸞背高駕。大詔快馬。憶少年、還共馳射。算金線輕拋。蓬戶底。

爲誰嫁。

是科朋輩如萬華亭、方茶山、張鄂樓、胡樹思、翁石峯、唐拓田、牛次原、孫淵如、阮伯元、南北榜皆中式。

### 祝英臺近

越調

丙午下第南歸。覓章酌亭遺稿不得。誌悼。

玉成塵。花作雪。魂逐亂雲去。燈黯書幃。綺語向何處。料應天上飛瓊。慵聽舊曲。竊歸作、瑤宮笙譜。已千古。嘔出昌谷心肝。飄零錦囊句。七寶樓臺。尋徧絳霄路。異時誰輯遺聞。英光再見。好編入、胸陽流寓。

解語花 林鍾羽

雨後舟中望廬山瀑布

高梁瀉月。疊嶂穿煙。初捩潯陽柁。九仙招我乘蒼翠。雨後素霓交墮。  
江光澹沲。玉叢裏、匡君端坐。疑半天、吹落銀河。界得青山破。雲外  
浮嵐靜鎖。擬香鑪峰側。依樹閒臥。彩鸞飛過登臨約。躡屩甚時方可。  
芙蓉萬朶。挂冰縷、纖塵難浣。圖畫中、遙送微吟。都共誰酬和。

八聲甘州 仙呂宮

滕王閣

瞰空江、傑閣與雲平。秋風送微波。想圖中雙蝶、霞邊孤鷺。古意良多。  
指點西山山色。依舊翠於螺。苔蘚殘碑蝕。誰與摩挲。健筆昌黎作  
記。附三王名後。此語非阿。笑兒曹輕薄。何苦廢江河。挂高帆、乘槎萬  
里。尙未知、風信竟如何。憑欄望。擊珊瑚、釃酒長歌。

一萼紅

覃溪師試南昌畢。讌客百花洲。侍坐卽事。

泛輕舟。值衡文偶暇。賓讌百花洲。旣屏笙歌。仍稀儻從。圖史聊佐觥  
籌。指雲際、匡廬秀色。羨宗匠、深坐玉壺秋。翡翠蘭苕。珊瑚碧樹。入網  
都收。細數西江詩派。問涪翁去後、誰別源流。天社編年。青神著錄。  
雙井高躅猶留。聽揮塵、清談未已。晚涼後、乘月更登樓。試與題名選  
石。共紀茲游。

高陽臺 商調

蔣修隅招同吳蘭雪飲藏園。兼晤其令弟秋竹孝廉。

竹翠敲涼。荷香淨暑。風來水榭無塵。舊雨開筵。招邀盡是畸人。君家  
兄弟如龍虎。酒半酣、笑語生春。客中身。劇飲淋漓。誰主誰賓。十年  
細讀藏園曲。儘移宮換羽。挹徧清新。接席何由。雲端悵望驂麟。須眉

展拜疑相識。向畫圖、凝想前因。

是日拜心餘  
先生遺像

拂征輪。記取洪都。小駐兼

齊天樂 正宮

謝蘊山先生招同胡維君小飲蘇潭上。并示西魏書凡例。  
夜涼翦燭蘇潭上。千秋是非同究。殺鑿騰天。焦梨鬻索。曲直於今誰  
剖。流傳既久。算驚蝶雄才。尚存紕繆。帝紀尊西。幾人能繼彥深後。  
談餘還檢舊稿。發凡矜且慎。高論希有。太素遺編。行沖軼簡。可惜飄  
零難購。風窗對酒。笑褒貶紛紛。見聞都陋。異日書成。玉堂勞大手。

渡江雲 小石調

漢口旅舍題壁

樓高黃鶴遠。扁舟小泊。南望武昌城。四更山吐月。客夢初回。浩浩大  
江聲。疎燈照夜。激秋風、雄劍龍鳴。傾數杯寂寥村酒。難遣旅中情。

休驚烏林赤壁。紫蓋黃旗。付辭人題詠。銷不盡曹興劉蹶。魏戰吳爭。  
青山如故周郎去。算後來、誰是豪英。眠未穩。依然枕上詩成。

### 念奴嬌

#### 汝寧懷古

戍樓吹角。正西風驅馬。孤城橫路。控引長淮形勢在。云是南朝懸瓠。  
浴鐵成羣。鳴笳結隊。都作沙場土。秋花開徧。鬪髀相視無語。奚况  
標榜虛聲。牛醫馬磨。瑣瑣誰憑據。賸有姦雄居亂世。此論差能千古。  
唐代強藩。金源毅魄。留得閒詩句。停鞭遐想。葛陂何日龍去。

### 卜算子

仙呂宮

#### 吹臺

騎馬汴城東。老樹秋風撼。寂寞梁王賸廢臺。滿地斜陽淡。  
浩浩走  
驚沙。解轡還登覽。不見當年阮嗣宗。遠寺來清梵。

戀繡衾

大梁元夜

梁園風細度玉簫。點春燈、梅蕊亂飄。漸隱約、歌聲動。晃銀花、樓上翠翹。湘簾半下紅窗煖。喜同心、樽酒夜邀。說不盡、喁喁語。惹天涯、芳草夢遙。

齊天樂 正宮

同方子雲、洪稚存、徐朗齋、陳觀光、遊鐵塔寺。聽寺僧彈琴。

晴空遙見浮屠立。高低繚垣遮護。紺色凝霄。青光照晚。疑有神工陶鑄。荒寒殿宇。看鴟尾斜陽。半縈煙樹。寂歷高天。一鈴風外學人語。離披蒿艾滿目。綠痕沿斷砌。同散幽步。乍響疏鐘。初通曲徑。仿佛禪扉微露。僧枯地古。恰茶話依依。又添新句。後約重來。瘦桐休再鼓。

光 觀

最惡琴。聞人言  
琴必大話之。

琵琶仙 黃鐘商

懷次原

生怕秋來。便牽動旅思。重重難釋。何意纔送西風。新寒更驚客。空折了疎梅一樹。奈無數、水程山驛。酒淺紅深。衣寒翠煖。誰共瑤席。夢魂遠。同此離愁。恨車馬勞勞。困行役。須倩曉雲扶起。向長安花陌。猶記取、香詞似錦。詠漢陂。翦破嬌碧。好句都說相思。倍憐標格。

摸魚兒

戊申秋過湯陰。不及訪圭塘遺址。卽次圭塘欸。乃集摸魚子韻。又集中此調起處。皆用鼃。无咎買陂塘。旋栽楊柳成句。今亦仍之。

買陂塘。旋栽楊柳。生平多少經務。巍然至正文章伯。也算濟時霖雨。吟化渚。料魏闕關心。不比梅花嶼。憑誰寄語。便黃閣三登。烏臺再入。



商略竟何趣。歸來後。漫幸君恩見許。青雲將次干呂。乾坤俯仰兵  
戈滿。愁讀黍離章句。傾秫醕。共難弟嘉賓。小緝田家譜。行人眺古。悵  
馬跡匆匆。雞聲喔喔。何處問荒圃。

鷓鴣天

平調卽林鐘羽

磁州道中荷花盛開

六月驅車暑未徂。滏陽風景勝三吳。宜人山似佳圖畫。稱意花如美  
丈夫。雲擘絮。雨跳珠。紅情綠意兩相扶。環城野水菰蒲長。曾有鴛  
鴦作隊無。

高陽臺

商調

望蘇門山

黛影分螺。嵐光撲馬。雲邊秀色深深。一朵芙蓉。隨煙捧出疎林。何人  
脫屣蒼霞外。聽半天、吹下鸞音。想如今。公和去後。冷落登臨。區區

典午當塗際。笑英雄豎子。都付閒吟。抗手羣仙。卑他阮嘯嵇琴。青山不挽征夫駕。悵古歡、無路追尋。滌塵襟。空餘澗壑。似寫遐心。

瑞鶴仙

高平調亦入正宮

光武廟

六龍方鬪野。發突騎、漁陽邯鄲初駕。滹池賴王霸。記蕪萋亭側。燎衣邨舍。中原禾下。不遑問、公孫躍馬。築雲臺、天上星辰。盡入中興圖畫。休訝。赤符膺瑞。白水徵祥。半成虛話。雄風逝也。千載後、孰真假。但秋原古廟。椎牛釃酒。父老年年賽社。讓桐江、一叟披裘。釣竿自把。

好事近

中呂宮亦入仙呂宮

正定道中小飲

秣馬鎮州城。城外荷花無數。解轡柳陰沽酒。看鷗鷺飛去。太行天矯控中原。形勢自千古。莫問前朝興廢。有青山如故。

祝英臺近 越調

牛次原招同孫淵如、胡樹思、阮伯元、小飲秋影山房。

雪初晴。簾乍捲。新月照杯酒。吳筍齊鹽。花下聚良友。趁他寒夜沉沉。  
論文看劍。且休問、嚴城更漏。半酣後。驗取春意潛迴。疎梅已如豆。  
一曲清歌。底用倩紅袖。相將鑄古陶今。唾壺敲缺。儘重酌、蒲桃盈斗。

滿庭芳 中呂宮

晏城曉發

斜月如眉。明星似李。粟粟霜壓征驂。撲衣濃翠。都是曉山嵐。高影離披滿地。知夾道、官柳毵毵。凝眸處。微茫雉堞。獨在亂雅南。休耽。京洛夢。同心乍遠。無限情含。早宵輪晨鐸。風味重諧。十載勞薪苦矣。思諫果。何日回甘。全輪卻。枯僧擁絮。燈火閉茅菴。

戚氏 中呂調

端午日遊寶障湖

木蘭艤。衝波搖過翠雲缸。碧艾懸檐。絳榴堆几。俗敦龐。淙淙水流瀧。離騷吟罷憶南邦。靈均毅魄安在。佩芳人遠。汨羅江。雲外何處笙歌。鼎沸更饒金鼓齊。攃漸衣香鬢影。柔櫓伊軋。都近船窗。荆楚國。士無雙。忠諫大節。直可配龍逢。神弜急。乍調郢曲。又犯吳腔。思難降。健筆萬石誰扛。且倒綠酒盈缸。線纏角黍。飯裹圓荷。湖上應薦薤苳。競看穿簾燕。攫浮水鴨。逐吠花龍。水戲今年最盛。赤金刀。厭虎更緣幢。雕題繡額效。叩駝。隔牆仕女。嬌語喧深巷。且趁閒。迴棹依花港。早斜照。蕭寺鐘撞。傍葦扉。蟹斲魚椿。那人家。不亞鹿門龐。向歸途。望沿城繡閣。盡爇銀缸。

法曲獻仙音

黃鐘商

揚州送葛菱溪。此調白石自注云。黃鐘商。俗名大石。南渡燕

樂七商起黃鐘。則此調與琵琶仙皆大石調也。

隋苑經過。廣陵留滯。幾日欣同吟硯。燕啄晴泥。蝶飛芳草。匆匆又看  
春錢。恰正是前遊處。桃花映人面。爲誰戀。聽驪歌。數聲催發。微醉  
後。還取碧牋重展。柳外綠波平。渺吳天、舟共人遠。落照孤帆。尙依稀。  
隔浦望見。悵離情千疊。那得并刀頻翦。

惜紅衣

無射宮

同方又輝喬樗友葉英多飲李艾塘處

煮酒方濃。烹鮮正熟。共來茅屋。驟雨敲荷。聲聲瀉寒玉。風微晝永。揮  
瘦塵。清談驚俗。幽獨。三徑冷香。散閒庭花竹。高吟遠矚。簾捲黃昏。  
苔痕上階綠。菟奇選勝。未足更然燭。十里畫船煙柳。軼事幾人能錄。  
待異書成後。秋樹借儂披讀。

念奴嬌

大石調

汪晉藩招同焦里堂小飲酒肆

蝶雲深處。見青帘偃蹇。籬端飄出。試拓南窗招客坐。恰好煙疎風密。  
竹几無塵。花瓷有酒。大可開緹帙。芰荷香送。賴君消此長日。自是  
吾輩疎狂。當壚眠甕。傭保何妨匹。作賦論兵俱逝水。樓上休彈瑤瑟。  
夜月三分。春風十里。往事猶能述。半酣歸去。碧桐涼沁吟筆。

摸魚兒

題汪損之家慶圖

護茅檐、枳花籬落。雙扉深掩清晝。拂雲千尺靈椿古。回映北堂護茂。  
還見否。有繞砌芝蘭、郁郁臨風秀。閒庭坐久。看雞哺鴉兒。童闕雉子。  
佳瑞更誰有。披圖處。想見君心孝友。紛華羞與相邁。嶺梅旖旎江  
籬薄。何況滿蹊桃柳。營半畝。待荷耒江鄉。共作歸耕耦。詩花釀酒。願  
慈竹平安。貞松健在。長此介麋壽。

一 翦梅

南呂宮

晚泊燕子磯

百尺危樓俯瞰江。山旣崆峒。水又春撞。閒吹玉笛不成腔。風顫銀釭。  
月浸篷窗。愁見牙檣燕一雙。詩筆休扛。酒盞難降。無端驚起隔花  
厖。船鼓逢逢。心事椿椿。

高陽臺

商調

同黃秋平焦里堂雨花臺觀劇

慷慨秦歌。婆娑楚舞。神前擊筑彈箏。尙有遺規。勝他吳下新聲。無端  
委巷談今古。混是非、底用譏評。鬱藍生。雜劇流傳體例分明。挺齋  
不作東籬去。算青藤玉茗。風氣初更。輾轉相師。可憐僞體爭鳴。何人  
禮失求諸野。悵碧天、無限遙情。暮雲輕。曲散人歸。月上高城。

水調歌頭

南呂商即敬指調

詞須擇調。如四字沁園春。五字水調歌頭。七字鷓鴣天。步蟾宮。皆玉田金淵所訶者。秋日登石頭城眺遠。偶製此闕。方家幸勿以未能免俗見誚也。

天塹本天險。形勢控三州。一時多少豪傑。分付水東流。不見沉江鐵鎖。但見沉沙鐵戟。六代總浮漚。古堞土花碧。山鬼晝登樓。霞散綺。濤湧雪。黯生愁。江山勝處。應有裙屐少年遊。已把齊竽吹裂。又把秦箏撥斷。重復看吳鉤。細數石城事。殘壘荻蘆秋。

蘭陵王

越調

臺城懷古

抱秋麓。隱隱荒城送目。斜陽遠。波映女牆。寒浦縈迴鷺爭浴。迢然古意足。誰續南朝舊錄。僧樓外。憑弔故宮。六代君臣此鳴玉。淒涼半樵牧。慨老去蕭郎。貽恨空谷。金甌一擲成殘局。算白馬如練。紫雲如



蓋妖祥前後類轉轂。笑多事蠻觸。蕉鹿競馳逐。暗屈指千年。興廢何速。黃塵莫唱當時曲。怕擊碎秦缶。按殘燕筑。雄圖都盡。但細草。到處綠。

小重山令

高坐寺

寶月金容絡暗塵。琉璃青黦黠。照前因。老松歲久漸通神。孤雲外。曾見六朝人。階下野狐馴。空山留故穴。幻中身。天風颯颯嘯荆榛。疎鐘寂。花雨滿苔茵。

摸魚兒

阻風燕子磯晤史望之小飲舟中

訝朝來、石郵方急。驚沙終日吹面。餘皇萬斛連檣泊。何況小舟如燕。情正倦。喜此際吟朋、恰向津亭見。煙蒲乍捲。更指點寒林。徘徊古岸。

靜挹翠微遠。蓬窗底。相對村醪酌徧。堆盤銀鱸香軟。吳雲漠漠還西望。目送去帆千片。何足羨。笑世事環生。頃刻陰晴變。羈懷共遣。待詰旦開頭。長江直下。趁取好風便。

### 齊天樂

邵二雲先生招同談星符、牛次原、兩孝廉、魯習之、王畹馨、兩同年小集。

先生箋釋蟲魚倦。乘閒偶招畸士。竹牖煙疏。桐階日朗。無限西山晴翠。清言未已。便諧謔軒渠。亦徵經史。更啓名山。酒邊商略宋朝事。高齋塵累不到。軟紅同作客。如許幽致。越飯抄雲。吳羹斫玉。都是江鄉風味。花光照几。恰香破盆梅。半含春意。曲曲迴欄。醉餘還共倚。

### 清波引

#### 泊柳林闌

水隨天遠。聽漁父笛聲宛轉。汶流清淺。柳疎翠猶展。夕影送煙雨。映帶芙蓉紅徧。賦情曾寄微波照。秋色有誰見。高檣大艫。飽帆舉。輕迅似箭。漸迷蒼巘。但雲樹難辨。蓬窗數杯酒。恰愛青齊香軟。望裏無限羈愁。醉時都遣。

摸魚兒

過程蘊光幽居

築幽棲、數椽臨水。重重花竹深護。柴扉只許同心到。三徑別通行路。開藥圃。愛面面軒窗、總是看山處。清樽共舉。指北苑烟林。南宮雨岫。宛在畫圖住。徘徊久。自笑天涯倦旅。征衫時拂塵土。燕臺春色梁園雪。都傍馬蹄飛度。須記取。記此日佳游、恰好閒中遇。新詩漫與。向華子岡前。藥家瀨側。細領輞川趣。

側犯

檢書得章酌亭遺札。淒然有作。

淡煙送碧。綺窗一抹斜陽晚。塵案乍檢。得書中故人簡。愁如衛洗馬。懶似嵇中散。無限。猶自覺、離情滿柔翰。空歌宋玉。不見吟魂返。人莫挽。玉樓成仙。路隔雲漢。記得蕭齋共斟翠琖。如幻。於今爲誰凝盼。

湘月

雙調

宜興萬氏。專以四聲論詞。畏其嚴者多詆之。廬州先著尤甚。以爲宋詞宮調。必有祕傳。不在乎四聲。今按宋姜夔白石集滿江紅云。末句無心撲。歌者將心字融入去聲。方諧音律。徵招云。正宮齊天樂慢。前兩拍是徵調。故足成之。及考徵招起二句平仄。與齊天樂脗合。又宋史樂志。載白石大樂議云。七音之協四聲。各有自然之理。王灼碧雞漫志。楊柳枝舊詞。起頭有側字平字之別。然則宋人皆以四聲定宮調。而萬氏之

說與古闍合也。先著妄人甯足晒乎。余恆謂推步必驗諸天。行律呂必驗諸人聲。淺求之。樵歌牧唱。亦有律呂。若舍人聲。而別尋所謂宮調者。則雖美言可市。終成郢書燕說而已。今秋。舟過荆溪。感而賦此。以酌紅友。卽白石所云。念奴嬌鬲指聲也。按鬲指亦謂之過腔。念奴嬌本大石調。今吹入雙調。故曰過腔。謂以黃鐘商。過入夾鐘商也。

小舟盪月。正篷窗眺遠。涼夜支枕。罨畫溪光。望不盡。百頃江鷗波浸。斷渚拖煙。高城攔雨。秋意蕭疎甚。樓臺明滅。數株楊柳。低蔭。空想堆絮園中。停尊按拍。製新詞如錦。律比申商。料後世。應有知音題品。花外簾空。山中雲杳。謂中仙樂笑。宮調無人審。臨風歌罷。扣舷聊佐清飲。

慶春宮

雪後泛舟孤山

晴意將迴。春痕微透。粉光研上湖光。雙鶴盤空。孤峰聳秀。小亭寒色  
蒼茫。照波清淺。是何處、疎梅破香。吟花人渺。雪後園林。孰與商量。  
先生舊隱荒涼。憑眺柴門。酌酒盈觴。短短疎籬。深深曲徑。昔年曾岸  
華陽。此中佳處。不輸似、東皋醉鄉。晚來風緊。蘭漿方移。凍合平岡。

醉垂鞭

正宮

春日湖上

草色接樓陰。長隄路。搖鞭去。匝地落花深。馬蹄何處尋。無端紫惹  
動相思。夢別離心。擁袂盼青禽。唯聞橫笛音。

花心動

雙調

葛嶺

空碧玲瓏。傍湖濬岡巒。四圍迴抱。水學佩環。雲想衣裳。人去尙留丹  
竈。野棠開過春飄泊。井眉上、亂紅誰掃。隔深隴。東風緩遞。數聲幽鳥。

抱朴書成送老。回首望銅駝。洛陽難到。阮籍詠懷。郭璞遊仙。都是  
後先同調。合離風雨。羅浮側。笑王馬。共他江表。問遺蛻煙霞。滿山路  
杳。

曲遊春

西泠春泛。用草窗韻。

日煖湖光靜。望淺波凝練。機上新織。白舫青窗。露春痕都傍。柳叢花  
隙。十里珠簾隔。聽何處畫樓吹笛。愛遠山。一抹濃嵐。含笑效人眉色。  
綺陌。晴雲弄碧。記前日輕寒。芳信猶勒。攜酒重來。早長隄黛染。短  
籬霞冪。落絮魚爭食。繫繫蘭漿水亭清寂。惹箇儂。夢影迷離。有誰認得。

若法儂句。草窗作六字。梅川作七字。今  
半梅川用七字句。梅川亦和草窗韻者。

湘江靜

表忠觀

陌上春深歸騎緩。望中原、李花零亂。霜寒一劍。潮迴萬弩。怕誰穿錢眼。不著柘黃衣。擁旄節、開門無患。孱孫納土。明廷報功。猶留得、表忠觀。奠菜羹。攜麥飯。奏神絃。里巫初散。紅粧仕女。青袍父老。指南來新雁。落日霸圖銷。靈旗上、疎風搖晚。英雄逝矣。行人弔古。空摩舊券。

高陽臺

商調

蘇隄泛舟至湖山神祠

燕蹙風來。鳩呼雨去。融融做出芳時。小約探春。舟輕不遣鷗知。蘭橈劃破浮萍影。啓翠奩、都是琉璃。學蛾眉。幾樹垂楊。次第成絲。沿隄綠鞦紅酣處。見參差金碧。微露叢祠。如此湖山。主持合有靈祇。麗人水畔乘春袂。蕪瓣香、同禮花枝。語遲遲。但說團圓。莫訴相思。

霓裳中序第一

商調

杭州府志。西馬陸有姜白石墓。乾隆甲寅冬。游湖上。尋之未



得。及晤鮑君淥飲。始知在武林門外。約暇時同訪。且擬表石於其上。各填一詞紀之。未幾。余之官宛陵。遂不果。途中耿耿。即用白石韻賦此解。庶他日重游踐前約也。

湖山自秀極。隱隱前游仍記得。探古莫辭倦力。怕情夢易沉。吟魂難索。樓陰樹隙。悵斷碑。誰問詞客。梅邊月。此番照我。尙作舊時色。寥寂。句昏塵壁。况小徑疎烟細織。空濛何處故跡。草綠裙腰。僅見阡陌。話餘空太息。更指點、雙峰送碧。他年約。同尋坏土。小酌畫船側。草窗作後半闕

多一字。然此調創自白石。宜從之。

百字令 大石調

阮伯元閣學。以重建曝書亭落成。再用竹垞圖韻新詞見寄。依韻奉和。

小長蘆畔。記烏篷支雨。抽帆曾泊。曝後遺書知在否。寂寞空亭疇託。

載酒探幽。研經送老。想像先生樂。風微人往。岸花猶自開落。今日  
使者南來。衡文訪獻。事事勞參酌。檢點荒煙。尋舊址。更葺桐窗松幕。  
拓取鷗波。分將鶴俸。負此舟藏壑。新詞遙和。爲君重按官角。

元作

儀徵阮 二元 芸臺

雙垞荒矣。問誰從潞水。書船回泊。經卷詩篇零落後。魂夢向誰棲  
託。把酒能招。披圖相慰。畢竟歸來樂。修成亭子。我來重爲君落。

才見五馬行春。雙鳧漾水。同此頻斟酌。尙有孫枝桐葉在。護爾西

風蓬幕。

伊太守授其元孫館。元又拔其元孫入學。

疊石栽花。引牆圍竹。依舊成林壑。者番題

柱。夕陽休礪牛角。

齊天樂

正宮

蒲圻張耘溪登岱。見德星巖石上。刻其尊人白尊翁所作銘。  
下馬拜之。羅兩峰爲繪岱宗拜石圖。同人題者甚衆。遂賦此

解。

向平五嶽游踪徧。天門雪鴻曾住。碧玉巖成。青霞鏤破。留得驚人奇句。捲風傲雨。算鬼物年年。夜深呵護。令子重來。舊題猶在數峰古。摩挲當日手蹟。夕陽牛礪角。瞻戀難去。竹素頻鈔。甌椎細拓。再拜秋雲深處。鬚眉認取。恰想像圖中。口吟心慕。至性纏綿。老顛休並舉。

又

題孫雨窗公子香稻邨莊圖

枳籬短短柴扉靜。高低翠畦環繞。岫擁青來。波扶綠起。都入晴窗憑眺。烏皮晝悄。使時覺檐牙。稻花香到。瘦柳垂陰。夕陽牛背笛聲小。恆農恆土最古。帶經鋤倦後。閒坐芳草。種樹新編。區田舊法。多少生平懷抱。秋成萬寶。愛場圃如京。倚欄吟嘯。指點雲邊。桂香應更好。

# 梅邊吹笛譜補錄

## 花犯

甲子秋。仲宣州官廨春海棠盛開。施雪帆以花犯新詞見示。按。花犯本一百二字。清真千里夢窗碧山諸作皆然。今雪帆詞祇一百字。蓋用弁陽水仙詞體也。考蘋洲漁笛譜。此詞題曰繡鸞鳳花犯。亦一百二字。竹垞詞綜誤脫二字耳。竊謂此調製自清真。所用去上句法諧婉處。皆宜恪遵之。乃和以質焉。

倚雕欄。嫣然顧影。天寒映羅袖。碧雲方瘦。纔半卷湘簾。疑是春晝。似嫌定惠文章舊。翻新眞未有。試悄問、小山僊客。紅粧曾見否。清秋更吟杜秋詩。穠姿睡醒未。宵涼初透。裁蜀錦。何人倩素娥重繡。西風

外。暈生笑臉。應不比朱唇朝帶酒。但祝取美人長在。黃花同耐久。

雙調折桂令

讀董解元西廂記

東鐘

柳絲亭。換羽移宮。寶甫何因。處處雷同。尺素緘愁。泥金報捷。佛殿奇逢。論衡本。都非蔡邕。月蝕詩。活剝盧仝。舉世推崇。妄別妍媸。誤殺兒童。

又

贈桃花庵西厓上人

先天

坐團蒲。參破詩禪。悟比黃梅。俊若青蓮。馴虎山中。釣魚磯上。騎鶴雲邊。繡貝葉。棲心梵典。擁桃花。稽首人天。淺醉閒眠。不是彌陀。也是神仙。

水仙子

聞新曲作 真文

歌殘越調鬪鷓鴣。又唱黃鐘點絳脣。北科南介無人問。是誰家新院本。早庚青。走入真文。宮調幾曾辨。務頭全未論。吳語難分。

慶宣和

送別 蕭豪

柳外春風送畫橈。別意蕭條。極目烟波路迢迢。去了去了。

閒情 支思

曲沼芹泥夜雨滋。軟語參差。愛殺雕梁並棲時。燕子燕子。

又 桓歡

坐對天邊白玉盤。小撲輕紈。月影今宵共團圓。正滿正滿。

芭蕉 魚模

綠滿閒庭五月初。大葉扶疎。最好宵來碧窗虛。驟雨驟雨。

商調山坡羊

嘲人效喬夢符

江陽

郎言多戇。娘言多詭。兩般都在奴心上。費思量。費推詳。未能排解翻  
惆恨。男兒運來當自強。娘休笑郎。郎休怨娘。

越調小桃紅

醉中作

皆來

眼中何處是蓬萊。笑指青雲外。塵世無如醉鄉。大甕新開。二豪歸去  
君休怪。心空四海。神遊三代。屈指幾人材。

中呂紅繡鞋

眞州秋泛

尤侯

遙指煙中高岫。緩搖江上輕舟。習習微涼報新秋。芙蓉臨水榭。楊柳  
隔溪樓。酒家何處有。

朝天子

夜思

東鍾

塞鴻砌蛩。萬里西風。送隴雲迢遞。海天空。一枕遊仙夢。好景誰同。良宵誰共。高歌曲未終。惱公醉翁。打破黃蘗甕。

赤壁圖

蕭豪

漢朝魏朝。畫裏容高嘯。大江東去響寒潮。總是淒涼調。葛相心勞。周郎年少。英雄久寂寥。大喬小喬。一片斜陽照。

早春

監咸

翠嵐碧潭。掩映芙蓉檻。綠楊遮戶影。麩麩。幾縷春雲暗。蚊蝶分探。鴛鴦同泛。粧成情半含。玉簪素衫。更比梅花淡。

南呂四塊玉

題李問原數椽瀟灑臨溪屋

真文



歌詠懷吟招隱。客到閒庭破苔痕。眼前名利君休問。柳抱村。花映門。  
酒在尊。

又寒山

地靜深。人蕭散。鎮日開軒對青山。倦來欹枕飢餐飯。水半灣。屋兩間。  
竹數竿。

南商調黃鶯兒

讀錄鬼簿

魚模

鄙語未全虛。稗官家有董狐。何人錄鬼編成簿。同樂院。燕青博魚。景  
陽岡。武松打虎。摘星樓。殷紂誅賢處。笑狂夫。醢雞甕裏。嗤點古人書。

